



The Holy See

IOANNES PAULUS PP. II LITTERAE APOSTOLICAE **UNIVERSALIS PER TERRAS** IN CIVITATE SANCTI
VINCETII ET GRENATENSIMUM

APOSTOLICA NUNTIATURA CONDITUR Ad perpetuam rei memoriam. – Universalis per terras Ecclesiae gubernacula
iam diutius tractantes Nos atque pastoralia etiam itinera diversas ad nationes populosque peragentes experiri plurimum
iuvat quantum tandem ad ipsum prosperandum evangelicum Ecclesiae opus ad communemque gentium pacem et
progressionem praestandam conferant sane feliciter contracta amicitiae publicae vincula hanc inter Sedem Apostolicam
et singulas passim hominum Civitates. Eoque proin laetamur in dies magis, quod eius modi rationes necessitudinis maior
usque nationum numerus suscipere valet ob rerum secundas quidem condiciones et Ecclesiae Catholicae inibi
aestimationem et ubique nunc percrebrescens studium communi scilicet industria confirmandorum iurium humanorum ac
iustitiae terrestris corroborandae. Tales igitur salutares huius consilii fructus cum gaudentes praevideamus aliis
nascituros in Caraibicis insulis, harum vi Litterarum Nostraque potestate condi legitime et institui censemus Nuntiaturam
Apostolicam in Statu Sancti Vincentii et Grenatensium eique officia indulta privilegia largiter tribui ex normis cuiusque
talis Legationis Apostolicae propriis, at Nuntiaturarum potissimum in regionibus vigentium quae de Congregatione pro
Gentium Evangelizatione pendent. Sedem autem ipsius ad tempus in urbe Portus Hispaniae defigimus praecipimusque
simul ut singula hic a Nobis edicta ac statuta virtutem suam servent et effectus generent iuridiciales tam in praesens
quam in posterum tempus; contrariis quibusvis rebus nequaquam obstantibus. *Datum Romae, apud Sanctum Petrum,
sub anulo Piscatoris, die decimo septimo mensis Aprilis, anno Domini MCMXC, Pontificatus Nostri XII.* AUGUSTINUS
card. CASAROLI a publicis Ecclesiae negotiis © Copyright 1990 - Libreria Editrice Vaticana
